


内閣文庫	
番號	漢 10213
冊數	8 (1)
函號	315 43

315-43



淺草文庫

禮部為陳言崇儒事於禮科抄出吏部驗封清吏司主事左贊奏伏觀天順八年正月二十二日

詔書內一款各處帝王陵寢及名臣賢士墳墓有被人毀發者所在有司即時修理如舊令附近人民一丁看護免其差役其餘墳墓但有露棺暴骨者悉與掩埋此

皇上仁厚之盛心曠古所無之令典也臣原籍江西建昌府南城縣人切見本縣有宋太學說書李觀墓在鳳凰山麓祝穆方輿勝覽紀觀無子孫每歲春秋守貳同學官拜掃以為故事歷年既久不惟拜掃之典已廢而其墳墓亦為樵牧踐蹂若更數



年必致毀夷臣考得李觀立心高古履行脩整竭力養親雅尚恬退倡立盱江書院講明正學訓迪生徒學者稱為泰伯先生其所著述有易論禮論共二十篇富國安民強兵策各十篇明堂定制圖序周禮致太平論皆足以羽翼聖經發明治體又有平土書二十章得井田之遺意慶曆民言三十篇論時政之得失其他文字若太學議泰州學記之類皆可矜式當時名臣范仲淹余靖交薦其賢先儒朱熹稱觀周禮論與其意合

聖朝纂脩五經大全觀所立言亦見采錄臣聞古者鄉先生沒則祭于社如觀者可謂一代之名儒後

學之師表不但如古所謂鄉先生而已今墳墓荒蕪俎豆不及臣竊惜之欽惟

國家崇儒重道以壽斯文之脉以衍太平之運如蒙准言乞

勅該部行移有司封其塋域禁約樵牧照例令附近人民一丁看護仍於墳所量立祠宇歲時致祭則於風化不為無補緣係陳言崇儒事理具本親齋具奏成化三年九月二十日該通政使司官於奉天門奏奉

聖旨該部知道欽此欽遵抄出到部看得吏部驗封清吏司主事左贊奏稱要將先儒李觀墳墓令有

司封其塋域禁約樵牧照例令附近人民一丁看
護仍於墳所量立祠宇歲時致祭一節緣崇祀本
處名賢乃有司當為之事合行連送仰付該司類
行江西布政司轉行建昌府委官督同南城縣當
該官事即將宋儒李觀墳墓封其塋域令附近里
老人民時加看護禁約樵牧不許侵犯違者究治
仍於墓前量立一祠每年春宜從有司祭以少牢
行禮如儀毋得因而科擾不便

建昌府重修李秦伯先生墓記

生而必死聖賢無異於衆人也死而不
亡與天地並久日月並明其惟聖賢乎
秦伯先生其亦聖賢之徒乎先生姓李
氏諱觀字秦伯學通五經尤長於禮以
文辭自立其言大而正郡治北有鳳凰
岡先生初書院其下學者餘千人南豐
曾子固其高弟也范公仲淹余襄公靖
交薦之召為太學說書卒年五十一葬
鳳凰岡之麓寶祐二年郡守楊鎮立興
文堂以祀之開慶元年郡守曾楚更其

堂曰思賢右立盱江書院仍舊名也書院廢而先生之墓墟矣成化三年春長樂謝公士元來守郡夢先生對浮大白飲覺而異之翌日有白于府曰盜發先生墓矣太守具棺衾將易葬焉啓壙視之二大白宛然夢中見者夢方解於是議請祠如故事會吏部主事左公贊以請

命下立祠塋南名曰景賢賜以少牢春暮行禮歲如初又募閩石工大營塚壙壙以石為之壙中高五尺廣視高損一深

視廣倍之中甃加堊外固以石前廣若堂繚以周垣湖西羅倫辦香謁之太守述其夢曰先生之歿距今四百十三年矣而精神感通有如此者蘇子曰不依形而立不恃力而行不待生而存不隨死而亡者其此之謂乎回視煙草中塚纍纍然太守嘆曰是庸非人乎哉倫曰何獨此也桓山之石驪山之銅庸非人乎哉其圖身後者非不至也曾幾何時狐兔穴其傍樵兒牧豎躑躅其中草中纍纍者曾不若也方其生也柄一國之

雄擅四海之富何求而不遂哉身死而
遂不保焉何也先生以節屋寒夫初無
一命之榮尺土之富而身後之榮終乎
天地焉君子其知所擇矣太守曰夫子
之言雍門周不如也請告邦人庶有聞
先生之風者

成化八年壬辰春三月朔旦立石

賜進士及第翰林國史脩撰永豐羅倫撰

直講李先生門人錄

先生年譜所以載先生之行事今以門人錄附庸
者亦欲使來者知先生師友之淵源也按陳次公
誌先生之墓曰門人陞錄者千有餘人今姓名可
攷者僅三十八人茲而不書久則愈無可攷故附
錄云

陳次公字漢傑南城人父琛先生夫人之伯父也次
公與兄漢公字伯英弟次山俱學於先生次公舉
茂材異等不中歸隱谷口著書與先生往還者二
十年先生臨終執其手託以遺文先生墓誌銘乃
次公所述也次山登皇祐五年第

傅野字亨甫南城人學於先生其先上饒人父垂範先生為誌其墓野學於先生蚤有立操與陳次公俱為門人稱首熙寧中郡以高材淹滯聞旨賜粟帛充軍學教授歷明州定海尉歸隱於沙溪之東巖有文集名通藁先生後集乃野所輯也

鄧潤甫字溫伯避高魯王諱以字行少與弟佑甫仲甫俱學於先生溫伯文章角出諸生上登皇祐元年第官至尚書左丞三入玉堂熙寧中上先生輯藁乞官先生之子參魯佑甫登熙寧二年第仲甫高尚不仕元祐中舉遺逸賜號和靜先生

李山甫字明叟避高魯王諱以字行更字公晦先生之族子也少學於先生登皇祐元年第官至西京作坊使知澧州號龍溪釣叟

陳光道字公亮南城人與兄光遠俱學於先生光道剛果庶辯多智數登嘉祐四年第仕至撫州通判號有為子先生之子參魯墓銘乃光道所作也光遠登元豐八年第

廖平南劔人父夷清徙居南城平十二歲而孤能自立學於先生登治平二年第常語後跋乃平所作也

陳汝器字適用南城人學於先生能詩元祐中為廬陵宰山谷亟稱之

黃曦字耀卿南城人學於先生文章典麗南豐先生
亟稱之元符三年乙科

傅翼字翼之南城人學於先生文行俱高熙寧六年
乙科終永豐令號甘圃有甘圃集

余疇若字堯輔南城人學於先生慶曆二年大理寺
丞周燮知南豐聞其賢請主學事先生以詩送之

傳代言南城人學於先生及卒先生為表其墓
陳瓊字天貺南城人學於先生出諸生右晚自肆山

水號谷口耕叟
鄧立字公儀南城人學於先生志合道一年三十二
而卒先生為辭傷之

陳君平南城人都官肅之子也學於先生少能文肅
冠舉進士入太學不第終於京年二十四先生誌
其墓

廖廷玉南城人陳漢公之壻也學於先生
饒景先南城人偕弟見先學於先生先生表其父昌

齡之墓

杜萬南城人居谷口先生有詩送之

王幾字復之天台人學於先生字之為作復說

陳世南豫章人學於先生以序送之

陳公燮字思道閩人學於先生贈之以序改字中道

張宏武夷人學於先生嘗以詩送之

張延之字伯仁學於先生為作字序以後十二人

湯延祖字子立學於先生字之以詩

陳特兄弟二人俱學於先生答之以書

彭昱學於先生嘗以詩送其赴舉

夏旦學於先生以詩送其赴舉

黃銑學於先生以詩送其赴舉

廖說學於先生為詩其蒙亭

周伯達學於先生見清話堂詩題

吳伯華學於先生以詩送之

上官直學於先生以詩送之

吳著學於先生以詩送之

嘗讀盱江舊志云曾舍人鞏鄧左丞溫伯皆先生之高第竊有疑焉蓋溫伯他日為中丞進先生所為文奏乞官其一子溫伯遊先生之門明矣然不能排新法之非識者惜之今盱忘以南豐並稱不知何據按李直講生於祥符之巳酉曾南豐生於天禧之巳未以年數攷之則直講多南豐十歲也若以直講南豐為師友恐不其然謂其在鄉學師之歟則直講以慶曆三年主郡學而南豐以是年自洪州歸臨川上齊工部書云祖母樂居臨川其後為文多道臨川之事謂其在太學師之歟則直講以嘉祐二年為太學說書而南豐以是年登進

士第明年調太平州法曹烏在其為師友哉舊志
所載若不加訂正襲訛承舛惟恐後人復誤後人
也

直講李先生門人錄卷終

賢太守之為邦崇鄉賢風後學凡以因敬梓者之心
而教易行肆泰伯先生於我肝有常祀七八年來乃
或撤厥祠亭為堂偃厥宰壘為院而置先生於雜祀
或擱然不知有先生惟先生嘗言人於夫子之道不
聞之是無耳也不見之是無目也不言之是無口也
不學之不思之是無心無精爽也今有仕是邦而不
知有先生不亦猶之無耳目口心精爽者乎往弗諫
景定初元太守雪軒魏侯峙祠墓乃復建亭朔告必
躬頻異乎前時觀又取遺書讀嘆其言足經世興太
平獨恨年譜有關遺字畫有訛脫更與肝之士參以
它書讎正二年錫之梓其將以開世之無耳目口心

精爽人矣乎予方服侯之為會

天子嘉侯治狀改守袁州因誦泰伯袁學記爾袁得賢君之句而有感遂書其後三年上巳日里中子張淵敬書

直講李先生年譜

真宗皇帝大中祥符二年己酉先生始生

祥符三年庚戌二歲

祥符四年辛亥三歲

祥符五年壬子四歲

祥符六年癸丑五歲

祥符七年甲寅六歲

祥符八年乙卯七歲

按先生見蘇祠部書云六七歲時調聲韻習字書勉勉不忘則知先生一二年間知向學矣

蘇祠部

祥符九年丙辰八歲

年譜

天禧元年丁巳九歲

天禧二年戊午十歲

按先生見余監丞書云十歲知聲律則知先生於

是年知習舉業矣余監丞時為南城宰

天禧三年己未十一歲

按先生作疑仙賦序云吾母無子禱禱無不至祥

符元年夢二道士奕棋於戶外往觀之其一取一

子授焉遂娠又云生十餘歲從先父適田間宿東

郊夢人以書標與之曰王狀元文集夢中以為沂

公之文也既而就學果不甚魯或時開卷愾然憶

念謂曾讀此書再思之未嘗見也詳此二夢則知

天生賢哲以壽斯文之氣脉豈偶然哉

天禧四年庚申十二歲

按先生見余監丞書云年十二近文章則知先生

於是年能文矣

天禧五年辛酉十三歲

乾興元年壬戌十四歲

是年丁府君憂按鄭夫人墓誌云年十四而先君

沒又云先君嘗學不應舉教其子作詩賦亦樂施

惠充直信則知先生家學有源委矣

仁宗皇帝天聖元年癸亥十五歲

天聖二年甲子十六歲

天聖三年乙丑十七歲

是年府君服除按鄭夫人墓誌云稍出游求師友則知先生出游必在府君服除之後

天聖四年丙寅十八歲

天聖五年丁卯十九歲

天聖六年戊辰二十歲

天聖七年己巳二十一歲

天聖八年庚午二十二歲

是年娶夫人陳氏按慶曆七年先生作夫人墓誌云陳氏今為南城人生五年養于伯父又十一年而嫁嫁十一年而卒又云復還舊居娶婦蓋先生

前此出游至是年始還家歟 又有云余監丞書

云十歲知聲律十二近文章思慮猖狂耳目病困

者既十年矣此書當作於是年

天聖九年辛未二十三歲

是年著潛書十五篇 又有見孫寺丞書云年二

十三雞鳴而起誦孔孟群聖人之書纂成文章以

康國濟民為意文章蓋指潛書也孫寺丞書為南城宰

明道元年壬申二十四歲

是年著禮論七篇其後余襄公有書與先生曰所示禮論七篇推進禮經準的世教派仁義贓刑政豈止獨步江表校聲名於後俊哉先生之有功于

禮經也如此 又作陳仲溫進士墓誌

按陳仲溫諱璆先生之伯丈也故墓誌序之末曰
初君之弟與其婦偕死息女始絕乳君愛養之如
已子長以嫁李氏

明道二年癸酉二十五歲

景祐元年甲戌二十六歲

是年有邵氏神祠記其畧曰建昌城北有民邵氏
世奉五通禱祀之人日累什百景祐元年里中大
疫而吾家與焉唯五通諭以無害疾之解去皆約
日時有功於予其可廢而不載作記恐是此年
景祐二年乙亥二十七歲

按先生見蘇祠部書云由六七歲時調聲律習字
書勉勉不忘逮于今茲年二十七矣此書當作於
是年

景祐三年丙子二十八歲

是年作明堂定制圖并序 平土書

上聶記注書

上李撰書

上宋修撰書

太平院住持記

冬至夜酒醒詩

甘露亭詩

按見聶記注書云行年二十八矣當在是年見李
修撰書云生平為文謹採二十四篇寫成一冊及
明堂定制圖一道并序草具其副辱諸侍者見宋

修撰書云嘗著明堂定制圖并序其意在贊明經
義以裨益一王之盛禮謹繕其副陳諸座隅則明
堂圖之作亦在是年也獨平土書不著所作歲月
然先生明年見范公而范公他日薦先生必以禮
論易論明堂定制圖平土書共獻必同作於此一
二年之間 張宗古送先生南歸序其畧曰自周
室距今曠千餘載此禮廢絕所以學者各是已見
競牽師習故復出泰伯以明其本蓋指明堂圖也
是年入京暫見宋修撰李修撰聶記注葉集賢諸
公皆許可宋公庠李公收聶公冠知葉公清臣也
會貢舉罷遂歸

景祐四年丁丑二十九歲

是年往鄱陽見范文正公其書云年二十九嘗遊
京邑彷徨而歸又無鄉舉其必必范公與先生書云
在鄱陽勞惠訪尋以改郡不不奉邀則知先生是
年鄉舉不利而往鄱陽訪范公也

寶元元年戊寅三十歲

是年作廣潛書十五篇 命 咸 野記 鄧公儀
傷辭 緣際師詩 惜雞詩

按廣潛書自序云歲辛未泰伯以潛名書後七年
羈栖山巖即而廣之復為十五篇則此書當作於
是年命箴云三十曰壯聖人以此則此箴亦當作

於是年廣潛書云羈栖山巖則野記亦作於是年
寶元二年己卯三十一歲

是年先生夢大雨震所居室有一人紫衣而冠謂
之雷神呼先生使前授之題曰春社詞後筆得八
句與之及覺記其首三句頗怪麗後七年以五句
足之按此夢與疑仙序二夢而三一為誕彌厥月
之祥二為神授斯文之中天生賢哲豈虛其證是
三夢皆可書 富國體
康定二年試制科則此策必作於是年

康定元年庚辰三十二歲
是年得男參魯 有上江職方書 又往越州赴

范高平公招故有登越山詩按丁亥年先生作亡
室墓誌云一男參魯僅毀齒蓋自庚辰至丁亥凡
八年故曰僅毀齒也

按先生上江職方書云行年三十餘近訪吳越而
歸曰三十餘則當在是年曰訪吳越而歸則訪范
公也江公攝寶元元年以職方守府

康定二年十一月改慶曆元年辛巳三十三歲
是年作建昌軍集賢亭記 修麻姑殿記

麻姑山仙都觀修三清殿記 梓山院修佛殿記
上吳舍人王內翰富舍人劉集賢慎發丞書
日出詩 感事詩 和植史君出城見梅詩

按集賢亭記序曰康定二年夏六月太守慎公作
新亭于軍門之南孟秋告成郡人李觀為記三清
殿及麻姑殿記皆是康定年號梓山佛殿記亦云
康定二年秋九月則是數記皆作於康定未改元
之前也上慎殿丞書蓋慎公其時以殿中丞守
盱江此書當作於未入京之先

上吳舍人王內翰富舍人劉佳賢書蓋吳公肅王
公堯臣富公弼劉公敞其時皆居朝此書當作於
入京之日然是年郡舉先生應茂材異等科有旨
召試故入京上諸公書又寄祖秘丞無擇詩歷序
應科本未則云憂愁經歲是先生留京一年也

慶曆二年壬申三十四歲

是年先生試制科得召第一長沙蕭注與先生書
云昨偕弟英求舉於京師間足下應賢良預第一
召試未有不心思目願欲識其面者 秋七月試
制科不第歸過南康見郡守祖秘丞

按皇祐類稿與祖秘丞詩云及過廬山南聞君初
布治又曰高會雖暫歡故園當速至是先生留康
廬日淺而歸興濃矣

是年又有寄小兒詩

送余疇若序

與章望之祕校書

與楊屯田書楊文公

麻姑山賦

寄周寺丞詩

惜才詩

送侯殿直知吉州詩

按寄小兒詩注云此兒纔三歲蓋庚辰得男至壬午恰三歲送余疇若序寄周寺丞詩蓋周燮以是年宰南豐請余疇若南豐主學故先生以序送其行楊屯田其時守筠州故有書與之麻姑山賦乃述高臺層瑤繚垣築粉之美必是修麻姑殿後所作當在是年送侯殿直詩曾得滁州在故鄉按國史歐公以慶曆二年知滁州此詩之作亦當在是年也惜才詩恐亦是作於下第之後

慶曆三年癸未二十五歲

是年集退居類稿十二卷 慶曆民言三十篇

作周禮致太平論三十篇

撫州菜園院記

雪中贈柳枝及柳枝答詩

寄周寺丞詩

送錢寺丞知白州詩

三賢詠

上蔡學士詩

寄祖祕丞詩

按先生集所為文名退居類稿云自弱冠迄今十五歲得草稿三百三十五首類為十二卷是年冬至日南康守祖無擇為先生作序則知先生是年下第退居既集退居類稿又有周禮致太平論焉其後陳次公述先生墓誌云及退居為周禮致太平論并序則實作於是年也 上蔡學士書言鄒子房事蓋蔡公以慶曆三年為諫官此書亦作於

是年周寺丞燮時為南豐宰錢寺丞得臣時以
南城宰知白州故先生有詩送之又寄祖祕丞
詩云郡守方仁賢學宮盛修理踵門致勤恪命我
談經藝余襄公薦章云下第退居四方生徒從之
講習鄧溫伯云慶曆三年南城始詔立學先生為
之師四方來學嘗數百人則知先生以是年退居
于家故郡守請主學事柳枝詩蓋因是年二月
入京遇雪而作也

是年中女生按丁亥年先生作陳夫人墓誌云中
女五歲其少未免懷蓋中女之生在是年也
先生作周禮致太平論三十篇而內治七篇居其

首其畧曰內宰以陰禮教六宮六宮后也又以陰
禮教九嬪九嬪掌婦學之法以教九御后尊也不
得不受教女御卑也而教亦及之是在王宮者不
可不知禮也余按此篇三歎成王周公致太平之
書其精神心術盡在於是使先生之志獲行如有
用我執此以往豈特王河汾能言之惜夫其不果
也

先生作慶曆民言三十篇開諱而下言言藥石字
字規戒先生斯時無官守言責少露梗槩一二年
間杜富韓范歐余王蔡君明臣忠三陽道泰公既
不能為三諫之詩以効君謨又不能為濃墨之頌

以劾石介雖在畎畝惓惓忠亦不能自已作為此
篇天子聖明芻蕘傳採持此上聞言者無罪四十
二年之治實嘉賴之故祖無釋曰真醫國之書爾

慶曆四年甲申三十六歲

是年上富公范公書

作麻姑山真君殿記

李子高墓表

陳伯英墓表

寄祖祕丞書

除夜感懷詩

南塘觀魚詩

二詩並次陳
殿丞蕭韻

按上富范書蓋獻慶曆民言及言國事故也

李子高墓表云卒於慶曆四年則墓表想亦作於
是年

陳伯英墓表云嘗銘陳仲溫之葬其子漢公字

伯英後十二年而死又從而表之仲溫乃先生之
伯文伯英乃即舅也仲溫之葬在壬申年伯英以
甲申年死故曰後十二年則墓表亦當作於是也
寄祖祕丞書云教道亦難行徒以釣積毀篋書歸
敝廬庠門任蕪穢先生此言蓋因上蔡學士書言
鄒子房事鄒因誣織先生同入郡園其事既白先
生乃棄學事而復家居也

慶曆五年乙酉三十七歲

是年有與胡安定書 寄祖祕丞詩 南城縣廳記

處士陳君墓誌銘及祭文 白石暹師塔銘

按與安定書云康定初錢塘別後二年自京師歸

中途曾寫書今又四年則此書當作於是年
是年余襄公薦先生于朝其章畧曰李觀博學通
識包括古今潛心著書研極治亂江南儒士共所
師法
閩中名士黃通以書與范文正公曰李觀生聖時
三十七年也其德行文學其智識材術疑三代英
靈復生于今大江而南皆呼曰先生豈應詔采都
下今副樞富公諫省歐陽公紫微余王言三班田
紫微淮南祖提刑皆當世之名儒莫不競造其門
而優禮之若吾公者知泰伯為最深惟其知之也
深故嘗有論薦泰伯之心

慶曆六年丙戌三十八歲

是年作長江賦

集皇祐續稿作序

足成夢中春社詩

上王刑部書

次王刑部遊麻姑詩

及唱和詩序

傳代言纂表

按先生乙未年再上富公書云慶曆四年以書言
南方事後二年作長江賦則此賦當作於是年
王刑部乃漕使達也 是年游信州作弋陽縣學銘
聞女子廬寄詩 弋陽縣堂北見夾竹桃海棠二詩
題靈陽宮龜峰精舍寫陂懷古詩 逢何道士詩
按先生皇祐三年作新成院記云前此子歸自信

又云既去五六年自此年至皇祐三年約五六年則游信必在是年若銘若詩皆作於在信之時也慶曆七年丁亥三十九歲

是年作禮論後語 刪定劉牧易圖序

宋屯田延平集序 亡室陳氏墓誌 處士饒君墓表

建昌知軍廳記 景德寺重修大殿及造彌陀閣記

邵武軍學莊田記 小女詩 海南編集

題韓偓詩後 答黃漢傑書

按禮論作於明道元年而後語云吾為禮論後十五年有持章望之論一篇以吾為好怪則禮論後語當作於是年刪定劉牧易圖序論見於答宋屯

田書亦當作於是年 宋屯田延平集蓋因入闕

訪福帥蔡學士路經昭武而作也宋屯田咸字贊之時為延平倅

昭武海南編詩因宋屯田見示海南編而作題韓

偓詩後因游闕而作 答黃漢傑書以漢傑貽書

言景德寺記及邵武軍學記言浮屠事故先生答

漢傑書云觀排浮屠固久於潛書於富國策人皆

見之矣豈年近四十而輒渝哉惟漢傑觀厥二記

不甚熟爾吾於此言乃責儒者之深非尊浮屠也

先生言年近四十則此書當作於是年

是年夫人陳氏卒按陳次公述先生墓誌云再娶

饒氏不知娶於何年

慶曆八年戊子四十歲

是年中女子死有哭女詩云妻死女已病踰年成
二喪曰踰年者蓋去年陳夫人卒今年中女死也
冬十一月作建昌軍儀門記 太平寺浴室記
寄祖祕丞詩

皇祐元年己丑四十一歲

是年作宋中舍及江夫人墓碣銘 送李山甫詩
是年范文正公薦于朝其章略曰李觀著書立言
有孟軻楊雄之風義臣今取到本人所業禮論七
篇明堂定制圖序一篇平土書三篇易論十三篇
共二十四篇編為十卷繕寫上進乞賜御覽則知

斯人之才之學非常儒也其人以母老不願仕乞
就除一官許令便養

皇祐二年庚寅四十二歲

是年作周醫博墓表 迴向院記 謝官表
謝范咨政啓 怡山長慶寺詩

是年赴范文正公招于杭州范公再薦于朝其章
曰臣去年錄進李觀所業十卷其明堂圖序一卷
今朝廷行此大禮千載一時斯人學古之心上契
聖作再錄上進乞加天獎以勸儒林旨授待仕郎
太學助教誥詞云學業優議論正有立言之體且
履行修正誠如薦章特以一命及爾其益進于道

勿患朝廷之不知也

皇祐三年辛卯四十三歲

是年作廣文陳生墓銘

承天院記

麻姑山仙都觀御書閣記

新成院記

送知軍曹比部移之虔州詩

按旴志曹公觀以皇祐三年守旴此詩當作於是年

是年丁母鄭夫人憂十二月葬于先府君墓東南

隅實建昌鳳凰山之麓按墓誌云方謀扶親西遊

夫人許之未及行而遭大故

皇祐四年壬辰四十四歲

是年集皇祐續稿八卷作序

刊行周禮致太平

論十卷

上孫觀文書

酬陳屯田詩

按續稿序云行年四十四疾疹時發作其於文字

間尚克有進也歟又云慶曆癸未錄退居稿後三

年復出百餘篇當在是年上孫觀文書蓋是年儂

志高寇廣西孫觀文西持節討之先生寄書陳利

害十事孫公答書云示教民病非留心博愛何以

及此 酬陳屯田詩云封豕長蛇戰嶺南蓋指儂

寇也此詩亦當作於是年

皇祐五年癸巳四十五歲

是年著常語上中下三卷

承天院羅漢閣記

栢林溫氏書樓記

傅進士墓銘

皇祐六年甲午四月改至和元年四十六歲

是年除鄭夫人服 作常語後序 袁州學記

清話堂詩 送嚴介序

聶夫人徐夫人張都官墓誌 袁州雜詩三首

先生作袁州學記河東柳淇書京兆章友直篆天

下號為三絕其學記畧曰惟四代之學攷諸經可

見天下治則揮禮樂以陶吾民一有不幸猶當仗

大節為臣死忠為子死孝詳味斯言此豈特為袁

州學校重且將為天下國家重故曰君子化民成

俗其必由學乎 袁州雜詩郡守祖無擇皆實其

韻 清話堂詩蓋與周伯達宿景德寺而作其詩

云無限中心不平事一宵清話又成空遂目其處
為清話堂且題八句云

至和二年乙未四十七歲

是年寄富公書并長江賦一首皆論東南利害

寄祖祕丞詩 送春二絕 送陳司理序

江屯田墓誌 陳都官墓碣銘

鄒夫人墓誌銘 鄭助教母陳氏墓銘

陳府君夫人聶氏墓銘

至和三年丙申九月改嘉祐元年四十八歲

是年有鉛山縣尉陳君墓銘

嘉祐二年丁酉四十九歲

是年國子監奏乞差太學助教李觀充太學說書
旨令赴太學供職按奏劄云雖因名儒論薦命試
一官未沾政祿而養道立壑欲望朝廷差充太學
說書冀有裨庠序風化

嘉祐三年戊戌五十歲

是年除通州海門主簿太學說書 作太學議篇
景德寺修院記

按誥詞云尔醇明茂美通于經術東南士人推以
為冠自佐學政逾年于茲孜孜渠渠務恪厥守祭
酒司業以為博士之職莫宜於尔可特授通州海
門縣主簿太學說書如故旨令詳究太學制度故

有學議

嘉祐四年己亥五十一歲

是年權同管勾太學蓋因胡瑗以病告假故有斯
命尋以祖母未祔先塋請假歸遷旨給假一月先
生遂歸八月卒于家十二月祔塋于鳳凰山府君
之塋

按陳次公作先生墓誌云臨終無他言惟執次公
手以明堂圖為託三禮米成為恨是先生又作二
禮論未成而絕筆也

直講李先生年譜終

直講李先生文集總目

卷第一

賦

長江賦

麻姑山賦

疑仙賦并序

卷第二

禮論七篇

并序禮論後語附

禮論第一

禮論第二

禮論第三

禮論第四

禮論第五

禮論第六

禮論第七

禮論後語

卷第三

易論十三篇

易論第一 易論第二 易論第三
易論第四 易論第五 易論第六
易論第七 易論第八 易論第九
易論第十 易論第十一 易論第十二
易論第十三

卷第四

刪定易圖序論

論一 論二 論三
論四 論五 論六

卷第五

周禮致太平論五十一篇并序

內治第一 內治第二 內治第三
內治第四 內治第五 內治第六
內治第七

卷第六

國用第一 國用第二 國用第三
國用第四 國用第五

卷第七

國用第六 國用第七 國用第八
國用第九 國用第十

卷第八

國用第十一 國用第十二 國用第十三

國用第十四 國用第十五 國用第十六

卷第九

軍衛第一 軍衛第二 軍衛第三
軍衛第四

卷第十

刑禁第一 刑禁第二 刑禁第三
刑禁第四 刑禁第五 刑禁第六

卷第十一

官人第一 官人第二 官人第三
官人第四

卷第十二

官人第五 官人第六 官人第七
官人第八

卷第十三

教道第一 教道第二 教道第三
教道第四 教道第五

卷第十四

教道第六 教道第七 教道第八
教道第九

卷第十五

明堂定制圖序 五宗圖序

卷第十六

富國策第十首

富國策第一

富國策第三

富國策第五

富國策第七

富國策第九

富國策第二

富國策第四

富國策第六

富國策第八

富國策第十

卷第十七

強兵策十首

強兵策第一

強兵策第三

強兵策第五

強兵策第二

強兵策第四

強兵策第六

強兵策第七

強兵策第九

強兵策第八

強兵策第十

卷第十八

安民策十首

安民策第一

安民策第三

安民策第五

安民策第七

安民策第九

安民策第二

安民策第四

安民策第六

安民策第八

安民策第十

卷第十九

平土書 二十條

卷第二十

潛書十五篇 并序

野記二篇 并序

廣潛書十五篇 并序

卷第二十一

慶曆民言三十篇 并序

開諱

備亂

審姦

防蔽

效實

慮求

謹聽

辨儒

廣意

損欲

本仁

慎令

考能

止幸

裁舉

卷第二十二

精課

懋節

崇衛

省盜

釋禁

南畝

敵患

柬士

儲將

遠私

正局

厚農

復教

孝原

天諭

卷第二十三

記

袁州學記

建昌知軍廳記

建昌軍儀門記

建昌軍集賓亭記

南城縣署記

邵武軍學莊田記

虔州柏林温氏書樓記

麻姑山重修三清殿記
重修麻姑殿記
麻姑山仙都觀記
御書閣後記
真君殿記

卷第二十四

太平興國禪院十方住持記
太平院浴室記
建昌軍景德寺重修大殿并造彌陀閣記
景德寺新院記
廻向院記
承天院羅漢閣記
新城院記
撫州菜園院記
修粹山寺殿記
邵氏神祠記

卷第二十五

序

阜祐續稿序
延平集
送余疇若南豐堂學序
送嚴介序
敘陳公燮字
序張延之字
敘張司理字

卷第二十六

表

謝授官表

啓

謝范資政啓
寄周禮太平論上諸公啓

元中江表傳目錄

卷第二十七

書

上富舍人書 上劉舍人書 上吳舍人書
 上王內翰書 與章祕校書 上江職方書
 上慎殿丞書 上楊屯田書 上聶學士書
 上葉學士書 上李舍人書 上宋舍人書
 上范待制書 上孫寺丞書 上余監丞書
 上蘇祠部書 寄上范參政書

卷第二十八

寄上富樞密書 寄上富相公書 寄上孫安撫書
 上蔡學士書 上王刑部書 與胡先生書

再登臺翠著作書 答李觀書 答黃著作書

再登臺翠著作書 答陳持書

卷第二十九

雜文

原文 原正 讀儒行

讀文中子 吊楊子 復說

命箴 畫贊 弋陽縣學銘

嘿堂銘 太學議 策問三首

策問六首

卷第三十

墓碑 傷辭附

元中江表傳目錄

進士陳君墓銘

處士陳君墓銘附祭文

廣生陳生墓銘

進士傅君墓銘

聶夫人墓銘

鄒夫人墓銘

鈐山縣尉陳君墓銘

徐夫人墓銘

鄭助教母陳氏墓銘

處士陳君墓銘

宋故贈都官正公墓碑銘

宋故朝散大夫守尚書屯田郎中上輕車都

尉賜緋魚袋江公墓碑銘并序

宋故中舍人公及夫人江氏墓碑銘

宋故朝奉郎尚書都官員外郎上騎都尉賜

緋魚袋陳公墓碣銘并序

宋故朝奉郎尚書都官員外郎上騎都尉賜

緋魚袋陳公墓誌銘

卷第三十一

陳府君夫人聶氏墓誌銘并序

進士傅君墓表

陳伯英墓表

處士饒君墓表

醫博士周公墓表

前進士廖君墓表

李子高墓表

先夫人墓誌

亡室墓誌

亡女墓銘

鄧公儀傷辭

白石暹師塔銘并序

卷第三十二

常語三卷

常語上

卷第三十三

常語中

卷第三十四

常語下

卷第三十五

古體

三賢詠

和蘇著作麻姑十詠

曹公碑

七星

陳州井

玳瑁石

秦人峯

流杯池

碧蓮池

虎跑泉

丹霞洞

葛仙壇

獲稻

哀老婦

寄懷二首

避暑

喜雨

送上官直

題昱師房二笑圖

寄祖祕丞

名男曰參魯以詩喻之

女色無定美贈鄉材

江亭醉後

寄章友直

中春苦雨書懷

弋陽縣學北堂見夾竹桃花有感而書

孤懷

讀韓文公駑驥篇因廣其說

送陳次公茂材

蝦蟆

惜鷄

日出吟

聞女子瘡疾偶書二十四韻寄示

讀史

和育王山十二題

金沙池 佛迹峯 七佛石 袈裟石

明月臺 石屏風 靈鰻井 供奉泉

育王塔 八角殿 晋年松 重臺蓮

美女篇 苦熱夜 丐僧

閔俗 感歎二首 寄鄰父

竹齋題事 贈黃秀才別 雨中作

獨居 閔雨 訪周道士

甘露亭 送丘寺丞

荅緣際師見示草書千字文并名公所贈詩序

春社詞并序 聞訓狐 聞喜鵲

解湯延祖字

卷第二十六

近體

五言二韻

詠竹 霜 冰

鷺 鴨 惜才又一首七言

五言四韻

山舍寓止 東巖精舍 閑夜

霧 自詠 睡思

秋熱 鑑湖夜泛 池亭小酌

迴胡舜元賦稿 迴黃通詩篇

送路拯北遊 感事 閑居

萍 送張驥 村行

感懷寄釋之 鷄 堂西夜坐

寄題陳造追養亭 送宜黃柳尉

送君俞 送黃秘丞 寄題廖說蒙亭

晏起 養疾 遠山

送吳伯華 次韻陳殿丞除夜感懷

早歸 晚聞角 庭樹

哭文二首 贈端師 寄題鄒氏延壽亭

感秋 次韻卷陳殿丞 讀趙氏淳化詩

小女 送吳著 題靈陽宮

龜峯精舍 鳴蜩 送張評事

送春 君錫以新詩相示因成四十字卷之

送李侍禁 寄周寺丞 次韻閻判官除夜

送閻判官 送彭昱應舉 送黃銑應舉

夏日郊園 寄黃晞 送黃介夫

送山甫 送沈郎中 送江茂才

贈端上人 千福寺昧軒 怡山長慶寺

傳翼甘圃 林屯田思軒 迴明上人詩卷

聽周大師琴 送覺師西游乞

御書 送分司吳太博還鄉

石中江表集目錄

送任大中 送杜奉職 送陽曲蔡尉

送武陵令 送酸棗鄧主簿

送仙遊知縣許延評 送社寺丞知永城

廻廖解元所業 送張寺丞 送何祕丞

送劍州張掾 送演教太師東遊

寄贈福山長老

五言六韻

書樓夏晚 小衫

乾元節群臣祝壽小人無位以詩繼之 悶書

同徐殿丞遊麻姑山陳屯田聞之以詩見寄次韻第二首

五言八韻

送李著作知柳州

五言十韻

送知縣蘇祕丞移英州 夏日雨中

七言二韻

鄉思 少年 自勉

戲題玉臺集

讀皮襲美病中書事詩有可憐真宰意偏解

困吾曹之句偶代卷之

雪中見梅花二首

和慎使君出城見梅花 雪中贈柳枝

柳枝卷 和天慶觀瑞香花

石中江表集目錄

十一

烏鵲

方平

璧月

睡起

讀長恨辭二首

弄妻

梁帝

鞦韆二首

嘲漢武

戚夫人

有感三首

自遣

睡思

遊寺醉歸却寄同坐

索酒

憶錢塘江

謝傳神平常人

次韻答提刑孫都官二首

謝知縣徐殿丞示及新詩

送流人

送周山人

遣興

詠桃

閏正月三日偶書二首

論文二首

送僧遊廬山

李郭

戲題荷花

戲贈月

葛陂懷古

七夕二首

宗人宅折桂堂

麻源題壁

馬嵬驛

齊世家

漢宮

景陽宮井

燕雀二首

張禹

孔光

元紀二首

聞鴛

學北堂有海棠一株顏色至佳凋落稍速憶而為詩

玉蝴蝶花

次韻陳殿丞觀魚

送傅野

送杜萬

儒行

感義

屈原

宋玉

贈日者鄒生

送夏旦赴舉

送春

元中送別目錄 三

曉角 送丁正臣 惜才又言一首

登越山 送古山人 送毗師西遊

送春寄呈祖表州二首 次韻陳屯田途中所寄

正月二十俗號天穿日以前煎餅置於屋上謂

之補天感而為詩

送薛經

僧志月碧雲軒改為景雲因書二首

書景雲軒壁 因遊華子崗題壁

卷第三十七

七言四韻

苦雨初霽 野人 書麻姑廟

客有話故丁祕監京師舊宅因而傷之

五龍塘 寄小兒

季夏雨中宛有秋色四望之際百感生焉因

題於紙

秋懷 書松陵唱和 七夕

早起有懷 留題歸安尉疑碧堂

答張駿叔 清明日作 晚思

暮春始遊城西 寄傅代言

丙子冬至夜酒醒 南齋詠風

小雨 清暉亭 題淨居院

往山舍道中作 秋晚悲懷

元中送別目錄

十四

殘葉

哭十姪

秋陰

寄介夫

書懷寄介夫

關徐

送張宏下第南歸

葛陂逢何道士

俞秀才山風亭小飲

謝宋屯田見示永平錄海南編

閩中歲暮

送侯殿直之官吉州

偶題饒秀才谿光亭

宗人宅仁知閣

早夏偶作

匈奴傳

忠武侯

次韻谷陳殿丞見寄

贈韓侍禁

送沈秘校

寄題錢塘毛氏西湖園

自解

不寐

韓偓集有自撫州往南城縣舟行見拂水菴

薇之詩南城吾鄉也因題八句

代書答陳次公

和君錫題壁

送王都曹

送危太博

題虞侍禁山亭

君錫宰壽春

錢寺丞知白州

次韻谷史太博

蟬

寄史屯田

谷立寺丞示月蝕詩

蓬屋

塔基

宜春臺

東湖

送趙拊

太平州十詠亭

送王尉

野意亭

靈源洞

送陳司理

送黃承伯

謝蔡十八丈示詩卷

清話堂詩

送柳縣吳主簿

覽余堯輔詩因成七言四韻

次韻酬屯田陳丈見寄

同徐殿丞遊麻姑山陳屯田聞之以詩見寄次

韻第二首

和陳屯田送知縣徐殿丞次韻

和屯田陳丈寄唐休次韻

和王刑部遊麻姑仙都觀 和遊丹霞有懷歸之意

七言八韻

送知軍曹比部移虔州

直講李先生文集目錄終

直講李先生外集目錄

卷第一

告詞二

皇祐二年七月 日一道

嘉祐三年七月 日一道

劄子四

右劄付李觀 右劄付李觀准此

右劄付李觀 右劄付李觀准此

薦章三

范文正公二首 余侍郎一首

卷第二

名公手書

范文正公

小簡

小簡

孫觀文

余侍郎

歐陽內翰

蔡密學

馬雜端

蕭閣副

小簡

祖學士

李侍郎

孔宗旦

卷第三

序詩墓銘

張學士送李君南歸序 宗古

葉內翰詩

祖學士詩

送春長句呈泰伯先生

無擇啓前日承泰伯先生寵示新詩三首謹

依嚴韻奉和幸賜采覽

右宜春臺

右東湖

右送春

寄李先生

麻姑山一首贈陳仲父賢良兼

泰伯先生

先生墓誌銘 并序

直講李先生門人錄

直講李先生外集目錄終

直講李先生文集卷之一

後學南城左棻編

後學廣昌何喬新校正

知南城縣事榘為孫甫訂刊

賦

長江賦

臣聞養萬物者惟地之大水居其上則地不能載以
觸以齧以斷以掘深或無底遠或幾千萬里則江之
為水臣不得而計之矣蜀焉我頂吳焉我腹淮我之
腋海我之足朝谿暮谷刮骨磨肉委之填之而莫飽
其欲萬山崔崔將裹將束如兒童之見犇馬縮頭斂

石門文集卷一
手避路而躑躅時清氣和無濤無波千丈一席可眠
可歌變動頃刻四天怒色凶煙暴雲對面漆黑誰為
風師誰為水伯不軌不法無別無識風兮何聲水兮
何形前雷後霆水堆雪層操舟之老尚不能自保况
乃遠而行客孰不椎心而太息出如登山入如沈泉
退無所止進不得前龍螭蛇龜固執殺生之權蝦蟹
瑣瑣猶或賈勇而爭先嗟乎生之難成之難父母君
師之所愛而託命於其間幸而免者蓋有之矣不幸
而死者何可勝紀魚腹未消鱗聲相繼豈非利欲之
牽人而危亡之不避揚荆巴蜀交廣甌閩地有_產產
物有常珍衣者食者器者玩者歌童舞女詭異妖冶

官所不取則掠之私舍孰賢孰才貪哉鄙哉重裝疊
載踰江越淮然則視長鯨之怒東海不啻如蟻之
浮杯嗚呼山川之阻土地之富天下有道則王之外
府天下無道則姦雄所處蓋足於財用而利於守禦
故周之衰也有吳有楚漢之亂也曰策曰權琅琊因
之以建大號劉裕得之以入中原道成蕭衍迄于霸
先自取自守人誰敢言赤壁之敗曹操壽春之走符
堅雖曆數之有在亦事勢之使然及夫孫皓之虐叔
寶之昏而後能滅焉勞乎哉經幾代而幾年臣聞周
書曰制治于未亂保邦于未危陰陽有消長日月有
蔽虧在乎備之得所則禍何能為伏惟國家重西北

而輕東南臣何以知之彼之官也特舉此之官也累
資歛於此則莫知其竭輸於彼則唯恐不支官以資
則庸人並進歛之竭則民業多墮為貪為暴為寒為
飢如是而不為盜賊臣不知其所歸諸夏內也為腹
心夷狄外也為手足輕重之理豈神明之所不燭秦
備胡而陳勝起事唐成蠻而龐勛肆毒觀其土崩之
由誠可為之痛哭古者有采詩之官惟賦亦古詩之
流賤臣不獲言于朝敢賦心之憂愁安得為太平之
草木蒙雨露兮千秋

麻姑山賦

巍乎高哉茲山之為異也吾不知夫幾百千里之廣

但見土老而石頑頂天而直上驗地勢之所極固亦
東南之藩障者乎路蹊蟠鬱前後相失罔巒峯左
右馳突鳴泉百雷躍下雲窟喬杉萬矛舞破煙骨靈
竒恍惚變見出沒置耳目之觀聽曾不究夫萬一其
間則有名天之洞禮神之堂高臺層瑤吸日月之光
繚垣築粉孕芝蘭之香偏門曲廊入迷其方斜軒亂
窻或溫而涼况乎御龍膏之酒倚雲和之琴一飲一
石一醉千日安知億萬人塵衣飛蚤虱其或黯然而
霧飄然而雨跬步之內則矇無所覩夜長漫漫山空
月寒鶴群戲風舞羽跚跚老猿抱子吟聲欲乾怪物
參差松柯水湄或步或馳或嘯而悲仙乎鬼乎千態

萬狀而使人心疑別有澗石之迹邈園潭之無底是
曰蛟龍之所止嬾而為旱怒而為水嗟我力耕之民
輟衣食之資而為禱祠之費巖岫冥冥古無人行百
獸飢死虎狼夜鳴是何假上真之名而神姦之所憑
也悲夫以地之竒以物之靈而逋客之經營全形養
氣采木茹菁未嘗有笳簫之聲鸞鳳之迎謝人品而
凌太清者徒見山寒兮青青水秋兮冷冷雲路咫尺
而不能以升豈非仙可得而不可求道可悟而不可
學彼其叛稼穡之功遺室家之樂越天常而慕冥冥
宜乎白首於丹竈之下幽死而無所託也

疑仙賦并序

觀家盱江其西十里則麻姑山顏太師真卿有記存
焉少北則麻源謝靈運詩所謂入華子崗是麻源第
三谷者也其山水清媚與神仙趾迹相附著在人口
吻吾母初無子凡有可禱無不至祥符元年夢二道
士奕棋戶外往觀之其一人者取局之一子授焉遂
娠及觀生十餘歲從先父適田間宿東郊既寐有人
以書與觀方制如牘表用黃其目曰王狀元文集夢
中以為沂公之文也就學以來果不甚魯或時開卷
愀然憶念謂曾讀此書再思之未嘗見也墨筆著辭
雖未善顧出自然不多勞力私心喜幸以所從受頗
靈異而不敢言今茲年三十有八矣乃用自疑作疑

仙賦儒者不言仙蓋患乎傷財舍生以學之者也苟
異於彼宜無害賦曰

噫噫仙乎為有為無為天之居為地之廬為山之國
為水之都為古為今為智為愚為崇為卑為肥為臞
與人類乎與人異乎將天下之利乎將一身而已乎
既匪聞而匪見我焉知其所如繫我之生卓犖瓌怪
地氣殊絕神休合會導愚心之趨驟犯古人之畿界
攀或無高博或無大戲鈞天之遺音冒慶雲之渥彩
意靈物之所右幸速成於當代難得而易失者時哉
善者走兮素髮催術金丹而不售撫道殣而銜哀然
則向為而生何為而來已矣夫嵩高降神生中肅收
拾中興還聖主長庚入夢生李白叫噪江南為逐客
今之生我豈無意二者他年終一得仙人若在全銀
宮歸去來兮誰阻隔

直講李先生文集卷之一

直講李先生文集卷之二

禮論七篇

予幼而好古誦味經籍窺測教意然卒未能語其綱條至于今茲年二十四思之熟矣比因多病退伏廬下身無他役得近紙筆故作禮論七篇推其本以見其末正其名以責其實崇先聖之遺制攻後世之乖缺邦國之龜筮生民之耳目在乎此矣

禮論第一

或問聖人之言禮奚如是之大也曰夫禮人道之準世教之主也聖人之所以治天下國家脩身正心無他一於禮而已矣曰嘗聞之禮樂刑政天下之大法

也仁義禮智信天下之至行也八者並用傳之者久矣而吾子一本於禮無乃不可乎曰是皆禮也飲食衣服宮室器皿夫婦父子長幼君臣上下師友賓客死喪祭祀禮之本也曰樂曰政曰刑禮之支也而刑者又政之屬矣曰仁曰義曰智曰信禮之別名也是七者蓋皆禮矣敢問何謂也曰夫禮之初順人之性欲而為之節文者也人之始生飢渴存乎內寒暑交乎外飢渴寒暑生民之大患也食草木之實鳥獸之肉茹其毛而飲其血不足以養口腹也被髮衣皮不足以稱肌體也聖王有作於是因土地之宜以殖百穀因水火之利以為炮燔烹炙治其犬豕牛羊及鴿

酒醴醢以為飲食藝麻為布縹緜為帛以為衣服夏居槽巢則有顛墜之憂冬入營窟則有陰寒重隄之疾於是為之棟宇取材於山取土於地以為宮室手足不能以獨成事也飲食不可以措諸地也於是斲金斲木或為陶瓦脂膠丹漆以為器皿夫婦不正則男女無別父子不親則人無所本長幼不分則強弱相犯於是為之婚姻以正夫婦為之左右奉養以親父子為之伯仲叔季以分長幼君臣不辨則事無統上下不列則群黨爭於是為之朝覲會同以辨君臣為之公卿大夫士庶人以列上下人之心不學則情也於是為之庠序講習以立師友入之道不接則離

也於是為之宴享苞苴以交賓客死者人之終也不
可以不厚也於是為之衣衾棺槨衰麻哭踊以奉死
喪神者人之本也不可以不事也於是為之禘嘗郊
社山川中霤以脩祭祀豐殺有等䟽數有度賈有常
奉賤有常守賢者不敢過不肖者不敢不及此禮之
大本也飲食既得衣服既備宮室既成器皿既利夫
婦既正父子既親長幼既分君臣既辨上下既列師
友既立賓客既交死喪既厚祭祀既脩而天下大和
矣人之和必有發也於是因其發而節之和久必怠
也於是率其怠而行之率之不從也於其罰其不從
以威之是三者禮之大用也同出於禮而輔於禮者

也不別不異不足以大行於世是故節其和者命之
曰樂行其怠者命之曰政威其不從者命之曰刑此
禮之三支也在禮之中有溫厚而廣愛者有斷決而
從宜者有䟽達而能謀者有固守而不變者是四者
禮之大旨也同出於禮而不可缺者也於是乎又別
而異之溫厚而廣愛者命之曰仁斷決而從宜者命
之曰義䟽達而能謀者命之曰智固守而不變者命
之曰信此禮之四名也三支者譬諸手足焉同生於
人而輔於人者也手足不具頭腹豈可動哉手足具
而人身舉三支立而禮本行四名者譬諸筋骸之類
焉是亦同生於人而異其稱者也言乎人則手足筋

禮記卷之三十一
三十一
骸在其中矣言乎禮則樂刑政仁義智信在其中矣
故曰夫禮人道之準世教之主也聖人之所以治天
下國家脩身正心無他一於禮而已矣

禮論第二

或人不論曰節其和者謂之樂行其怠者謂之政威
其不從者謂之刑信然矣其所以統於禮者願聞其
指曰昔者聖人之制禮也因十二月之氣分而為律
呂因六律六呂作為十二管因其清濁與其輕重配
而為五聲因其五聲變而雜之以為八音或為歌詩
或被於金石絲竹匏土革木之器爰及干戚羽旄以
導人之和心以舞人之手足小大有所終始有經倡

和有秩節奏有差詘伸俯仰必有齊也綴兆行列必
有正也宮軒特縣各當其位四六八羽各照其數以
範五行以調八風以均百度以象德行以明功業以
觀政治以和人神此禮之一支樂著矣出號令立官
府制軍旅聚食貨號令所以明約束官府所以正職
掌軍旅所以待不虞食貨所以贍不足是故為之符
璽節旄以信號令為之掾屬胥徒以備官府為之甲
冑五兵以成軍旅為之井田賦貢以興食貨為之城
郭溝池所以限內外也為之度量權衡所以平多少
也為之書契版圖所以窮變詐備遺忘也為之圖行
桎梏所以嚴推劾禁犇逸也官各有守事各有程先

後有次遲速有檢以辨國之大事以平天下之民以
躋至治此禮之二支政成矣伐不義侵不庭刺有罪
或以鈇鉞或以刀鋸為大辟為宮為剕為墨為劓為
剕為鞭為朴為流為贖輕有其等重有其常用之有
地決之有時所以懲天下之人使皆遷善而遠罪此
禮之三支刑行矣夫所謂禮者為而節之之謂也是
三者其自成乎果有為之者乎其自治乎果有節之
者乎苟不為也不節也則十二管不作五聲不辨八
音之器不具干戚羽旄不設小大無其所終始無其
經偁和無其秩節奏無其差詘伸俯仰不齊也綴兆
行列不正也縣之面不殊也羽之數不分也如此則

何以見樂哉不為也不節也則號令不出官府不立
軍旅不制食貨不聚符璽節旄不作掾屬胥徒不備
甲冑五兵不成井田賦貢不興城郭溝池不修度量
權衡不均書契版圖不著園犴桎梏不嚴官無其守
事無其程先後無其次遲速無其檢如此則何以見
政哉不為也不節也則不義不伐不庭不侵有罪不
刺鈇鉞無其準刀鋸無其平大辟宮剕墨劓剕鞭扑
流贖皆無其法輕無其等重無其常用之無其地決
之無其時如此則何以見刑哉由是而言故知三者
果有為而節之者然後能成也能治也為乎飲食衣
服宮室器皿夫婦父子長幼君臣上下師友賓客死

喪祭祀而節之者既謂之禮矣為乎十二管五聲八音千戚羽旄號令官府軍旅食貨符璽節旄掾屬胥徒甲冑五兵井田賦貢城郭溝池度量權衡書契版圖園行桎梏鈇鉞刀鋸大辟官刑墨劓荆鞭扑流贖而節之者反不謂之禮可乎若是則三者果禮之支也而強其名者也

禮論第三

或曰樂刑政之說既承教矣敢問溫厚而廣愛者仁也斷決而從宜者義也疏達而能謀者智也固守而不變者信也則然矣其何繫於禮哉曰百畝之田不奪其時而民不飢矣五畝之宅樹之以桑而民不寒

矣達孝悌則老者有歸病者有養矣正喪紀則死者得其藏修祭祀則鬼神得其饗矣征伐有節誅殺有度而民不橫死矣此溫厚而廣愛者也仁之道也君為君焉主政令必生殺不得不從矣臣為臣焉守職事死干戈不得少變矣男女有別不得相亂矣長幼有序不得相陵矣興廉讓則財不得苟取位不得妄受矣立諫諍則不得諱其惡矣設選舉則賢者不遺矣正刑法則有罪者必誅矣此斷決而從宜者也義之道也為衣食起官室具器皿而人不乏用矣異親疏次上下而人不興亂矣列官府紀文書而姦詐可窮矣築城郭治軍旅而寇賊不作矣親師傳廣學問

而百慮畢矣此疏達而能謀者也智之道也號令律式以約民心蔑有欺矣祿位班次以等賢愚蔑相犯矣車馬服御以章貴賤而人不疑矣百官不易其守四民不改其業而事不僭矣言必中行必果而天下率從矣此固守而不變者也信之道也若夫百畝之田不奪其時五畝之宅樹之以桑達孝悌以養老病正喪紀以藏其死脩祭祀以饗鬼神征伐有節誅殺有度定君臣別男女序長幼興廉讓立諫諍設選舉正刑法為衣食起宮室具器皿異親疏次上下列官府紀文書築城郭治軍旅親師傅廣學問為號令律式祿位班次車馬服御官守民業言而必中行而必

果者謂之非禮可乎既曰仁矣曰義矣曰智矣曰信矣總而言之又皆禮矣若是則仁義智信果禮之別名也

禮論第四

或曰仁義智信疑若根諸性者也以吾子之言必學禮而後能乎曰聖人者根諸性者也賢人者學禮而後能者也聖人率其仁義智信之性會而為禮禮成而後仁義智信可見矣仁義智信者聖人之性也禮者聖人之法制也性畜於內法行於外雖有其性不以為法則曖昧而不章今夫木大者可以為棟梁小者可以為榱桷不以為屋室則朽於深山之中與樸

三才圖會卷二 七
檄同安得為棟梁榱桷也温厚可以為仁斷決可以為義疏達可以為智固守可以為信不以為禮則滯於心習之內與無識同安得謂之仁義智信也屋既成雖拙者必指之曰此棟也此梁也此榱也此桷也禮既行雖愚者必知之曰此仁也此義也此智也此信也賢人者知乎仁義智信之美而學禮以求之者也禮得而後仁義智信亦可見矣聖與賢其終一也始之所以異者性與學之謂也中庸曰自誠明謂之性自明誠謂之教誠則明矣明則誠矣自誠明者聖人也自明誠者賢人也然則賢人之性果無仁義智信乎曰賢人之性中也楊雄所謂善惡混者也安有

仁義智信哉性之品有三上智不學而自能者也聖人也下愚雖學而不能者也具人之體而已矣中人者又可以為三焉學而得其本者為賢人與上智同學而失其本者為迷惑守於中人而已矣兀然而不學者為固陋與下愚同是則性之品三而人之類五也請問學之得失曰所謂本者禮也知乎仁義智信之美而不知求之於禮率私意附邪說蕩然而不反此失其本者也故世有非禮之仁矣有非禮之義矣有非禮之智矣有非禮之信矣是皆失其本而然也敢問其目曰奪其常產廢其農時重其賦稅以至飢寒憔悴而時賜米帛以為哀人之困憲章煩密官吏

在酷殺戮無數而時發赦宥以為愛人之命軍旅屢
動流血滿野民人疲極不知喪葬而收斂骸骨以為
惠及死者若是類者非禮之仁也背其君親疏其兄
弟而連結私黨以死相赴以為共人之患諂諛機巧
以動上心而數辭其爵位及其貨財以為謙讓君有
過失而不能諫正而暴揚於外身有隱惡不能自改
而專攻人之短以為強直賢才果勇不能用於公家
而私相接舉以為己力下民之愚而不能教訓陷之
於惡然後峻刑以誅之以為奉法若是類者非禮之
義也為智不能以制民用修世教起政事以治人齊
軍旅以禦亂以為天下國家久長之策而專為姦詐

巧辯以徼一時之利若是類者非禮之智也為信不
能以一號令重班爵明車服以辯等守職業以興事
使天下之人仰之而不疑而專為因循顧望以死兒
女之言若是類者非禮之信也今有欲為仁義智信
而不知求之於禮是將失其本者矣

禮論第五

或人請問樂刑政亦有非禮者乎曰善哉爾之問也
夫夷蠻戎狄荒淫靡曼之音雜其倡優輔以子女諧
笑顛亂以動人耳目移人心氣若是類者非禮之樂
也或重刑辟變法律伺人小過鉤人微隱以為明察
或悲衰怯懦容貸姦宄以為慈愛或急征橫賦多方

孫索杯聚畜積以為強國或時起土功毆人為卒用
於無用以為豫備若是類者非禮之政也或為輟裂
鼎鑊炮烙菹醢剝面夷族以威天下若是類者非禮
之刑也曰子所謂禮者為之節之者也若是三者豈
無為之者乎豈盡無其節乎曰夫所謂為者先王之
為也所謂節者先王之節也先王之所以為而節之
者非妄也必有仁義智信之善存乎其間矣不念古
昔不師先王是皆妄為也妄節也君子不以為禮也
或曰樂刑政皆禮也先儒之述何以不止於禮而言
禮樂刑政曰樂刑政雖統於禮蓋以聖人既別異其
名世傳已久止言禮則人不知樂刑政故並列之使

人得以兼用然首之以禮而樂刑政次之意者謂樂
刑政咸統於禮歟譬諸孔門四教曰文行忠信忠信
豈非行乎蓋以止言行則人不知忠信故並列之然
先之以行而次以忠信謂忠信咸統於行也然則所
謂仁義禮智信者亦猶是哉曰非矣樂刑政者禮之
支也未盡於禮之道也其本存焉亦猶忠信者未盡
於行也舉禮之本而與樂刑政並列可矣今言乎仁
義智信則禮之道靡有遺焉禮與仁義智信豈並列
之物歟仁義智信者實用也禮者虛稱也法制之總
名也然而所以與仁義智信並列而其次在二者意
者謂雖有仁義智信必須以禮制中而行之乎曰鄭

氏注中庸性命之說謂木神則仁金神則義火神則禮水神則信土神則智疑若五者並生於聖人之性然後會而為法制法制既成則禮為主而仁義智信統乎其間若君臣之類焉曰爾謂禮之性果何如也曰豈非能節者乎有溫厚斷決疏達固守之性而加之以節遂成法制焉曰節之者義之性也義斷決而從宜豈非能節者哉法制之作其本在太古之時民無所識飢寒亂患罔有救止天生聖人而授之以仁義智信之性仁則憂之智則謀之謀之既得不可以不節也於是乎義以節之節之既成不可以有變也於是乎信以守之四者大備而法制立矣法制既立而命其總名曰禮安有禮之性哉鄭氏之學其實不能該禮之本但隨章句而解之句東則東句西則西百端千緒莫有統率故至乎性命之說而廣求人事以配五行不究其端不揣其末是豈知禮也哉或曰月令之推五性亦然矣何如曰月令之書蓋本於戰國之時呂氏門人所作至唐增修之未足以觀聖人之旨也後之人見仁義禮智信列名而齊齒謂五者之用各有分區故為仁義智信則不取於禮而任其私心為禮則不能辨仁義智信但以器服物色升降辭語為玩以為聖人作禮之方止於窮奢極富炫人聽覽而已矣行其事不知其本觀其象不知其意因

謂禮有質文可隨時而用先王有作我可以作先王
有變我可以變而不知先王之所以作而變者有所
為于傷也此之所以作而變也復何以哉苟禮之所
之止於器服物色升降辭語而無仁義智信之大則
是瓊瑣有司之職耳何聖人拳拳之若是乎郊特牲
曰禮之所尊尊其義也失其義陳其數祝史之事也
故其數可陳也其義難知也知其義而謹守之天子
之所以治天下也或曰吾子所稱先儒並列禮樂刑
政及仁義禮智信之意曷以知先儒之意果若吾子
之言乎曰以予度之先儒之意當若是也若是則善
矣或異於此則先儒之言者皆不知禮而妄言也予

何咎哉曰先儒既並列之而吾子乃論而為一敢問
何謂也曰並列之使人記其條目用之而不遺先儒
之事也論而為一使人知其本根學之而不失予之
志也或曰前所謂節其和者命之曰樂行其怠者命
之曰政威其不從者命之曰刑溫厚而廣愛者命之
曰仁斷決而從宜者命之曰義疏達而能謀者命之
曰智固守而不變者命之曰信狗是而言則亡者似
皆禮之別名也何以樂刑政則謂之支而強其名仁
義智信則止謂之別名也曰樂刑政各有其物與禮
本分局而治十二管五聲八音干戚羽旄樂之物也
號令官府軍旅食貨政之物也鈇鉞刀鋸大辟官刑

墨削剝鞭扑流贖刑之物也是三者之物與飲食衣服宮室器皿夫婦夫子長幼君臣上下師友賓客死喪祭祀之目少異故得謂之支而強其名也夫仁義智信豈有其物哉總乎禮樂刑政而命之則是仁義智信矣故止謂之別名也有仁義智信然後有法制法制者禮樂刑政也

有法制然後有其物無其物則不得以見法制無法制則不得以見仁義智信備其物正其法而後仁義智信炳然而章矣或曰前所謂刑者政之屬誠然矣而吾子復並列之何謂也曰因先儒之言從而論之不違變易耳其旨既明其辭雖在奚有害於事哉曰敢問吾子之列禮樂刑政之物仁義智信之用盡於吾子之言乎抑有所遺者乎曰凡予所言者大也不及其細也畧也不及其詳也從其類而推之苟合乎禮本乎聖者皆是也奚待予之盡言哉

禮論第六

或曰樂記曰聖人作樂以應天制禮以配地禮樂明備天地官矣又以天地卑高動靜方物在天成象在地成形以為禮者天地之別也地氣上齊天氣下降陰陽相摩天地相蕩雷霆風雨四時日月百化之興以為樂者天地之和也由此觀之則禮樂之比隆競大蓋已著矣而吾子統之於禮益有疑焉曰彼以禮

為辯異樂為統同推其象類以極于天地之間非能
本禮樂之所出者也禮也者豈止於辯異而已哉樂
也者豈止於統同而已哉是皆見其一而忘其二者
也曰古之言禮樂者必窮乎天地陰陽今吾子之論
何其小也曰天地陰陽者禮樂之象也人事者禮樂
之實也言其象止於尊大其教言其實足以軌範其
人前世之言教道者衆矣例多闊大其意汪洋其
以舊說為陳熟以虛辭為微妙出入混沌上下鬼神
使學者觀之耳目驚眩不知其所取是亦教人者之
罪也或問孟子曰惻隱之心人皆有之羞惡之心人
皆有之辭讓之心人皆有之是非之心人皆有之惻

隱之心仁之端也羞惡之心義之端也辭讓之心禮
之端也是非之心智之端也孟子既言人皆有仁義
之性而吾子之論獨謂聖人有之何如曰孟子以為
人之性皆善故有是言耳古之言性者四孟子謂之
皆善荀卿謂之皆惡揚雄謂之善惡混韓退之謂性
之品三上焉者善也中焉者善惡混也下焉者惡而
已矣今觀退之之辯誠為得也孟子豈能專之曰性
之說既盡之矣然其以禮與仁義智並列何如曰是
皆據世俗而言不及為之統率耳辭讓者義之一節
也又淳于髡問曰男女授受不親禮也嫂溺則援之
以手乎孟子曰嫂溺不援是豺狼也男女授受不親

禮也嫂溺援之以手權也夫權智之動義之會也詳
孟氏此言則義而智者不在先王之禮歟曰孟子據
所聞為禮以己意為權而不謂先王之禮固有其權
也自今言之則必曰男女授受不親禮也嫂溺援之
以手亦禮也喪服四制曰父在為母齊衰期者見無
二尊也百官備百物具不言而事行者扶而起言而
后事行者杖而起身自執事而后行者面垢而已禿
者不鬚偃者不袒跛者不踊老病不止酒肉凡此八
者以權制者也若是則先王之禮豈無權乎然其上
文則曰恩者仁也理者義也節者禮也權者智也於
此則是言之者惑矣其所謂恩者為父斬衰三年也

所謂理者為君亦斬衰三年也若茲二服與父在為
母齊衰扶杖面垢不鬚不袒不踊不止酒肉之事非
禮何以著之自今言之則必總四制以為禮而分仁
義智於其間可也或人變色而作曰善哉吾子之論
樂刑政仁義智信咸統於禮也其始得之於心歟抑
嘗聞聖人之言及此者歟曰予聞諸聖人矣禮運記
孔子之言曰禹湯文武成王周公此六君子者未有
不謹於禮者也以著其義以考其信著有過刑仁講
讓示民有常其下文曰禮者君之大柄也所以別嫌
明微儆鬼神考制度別仁義所以治政安居也周公
作六官之典曰治典曰教典曰禮典曰政典曰刑典

曰事典而并謂之周禮今之禮記其創意命篇有不為威儀制度者中庸緇衣儒行大學之類是也及其成書總而謂之禮記是其本傳之者亦知禮矣不獨此二書而已也韓宣子適魯見易象與魯春秋曰周禮盡在魯矣則當時亦謂易象春秋為禮經也故知禮者生民之大也樂得之而以成政得之而以行刑得之而以清仁得之而不廢義得之而不誣智得之而不惑信得之而不渝聖人之所以作賢者之所以述天子之所以正天下諸侯之所以治其國卿大夫士之所以守其位庶人之所以保其生無一物而不以禮也窮天地亘萬世不可須臾而去也或曰曲禮

謂禮不下庶人而吾子及之何哉曰予所言者道也道者無不備無不至也彼所言者貨財而已耳謂人貧富不均不可一以齊之焉然而王制曰庶人縣封葬不為兩止不封不樹喪不貳事此亦庶人之喪禮也庶人春薦韭夏薦麥秋薦黍冬薦稻韭以卵麥以魚黍以豚稻以鴈此亦庶人之祭禮也既庶人喪祭皆有其禮而謂禮不下庶人者抑述曲禮者之妄也

禮論第七

或人敢問禮之所興自於何聖曰楊子雲謂法始於伏犧而成乎堯今觀易繫辭其制器取象信自伏犧神農黃帝以來也禮本之興其在三皇可知矣大章

章之也咸池備矣咸池者黃帝之事上古結繩而治
後世聖人易之以書契百官以治萬民以察此亦黃
帝之事也弦木為弧剡木為矢弧矢之利以威天下
此亦黃帝之事也則樂政刑之興亦在三皇矣及夫
堯舜繼禪禹成其功成湯文武翦其禍難周公坐而
修之孔子著之於冊七十子之徒奉之以為教而後
禮樂刑政之物仁義智信之用囊括而無遺矣或曰
周道其盛矣然魯諸侯也而用天子之禮樂何如曰
昔者武王既崩成王幼不能蒞阼周公攝天子之位
作禮樂朝諸侯而天下大定七年致政於成王成王
以周公為有勲勞於天下於是封之曲阜地方七百

里革車千乘命魯公世世祀周公以天子之禮樂此
蓋成王謂周公有王者之德攝王者之位輔周室致
太平者周公之為也故於其死用王禮祀之以尊之
焉若是則魯以此祀周公可也豈及其餘哉至其子
孫遂徹而用之凡制宮廟設官職祭祀喪紀車馬服
器率倣於周此則非矣周君也魯臣也人臣而用其
君之禮樂何以示民哉成王必欲其臣行天子禮樂
則當賜之周公俾其身用之不須命魯公世世以此
祀之也生則臣也死則鬼也鬼與人異用之非僭故
知魯以此祀周公可也穆公之母卒使人問於曾子
曰如之何曾子曰哭泣之衰齊斬之情饋粥之食自

天子達布幕衛也。繆魯也。夫布幕諸侯禮也。繆魯天子禮也。疾魯之僭，故舉諸侯以示之焉。隱公考仲子之宮，將萬焉。問羽數於衆仲，對曰：天子八，諸侯六，大夫四，士二。公從之。書曰：九月，考仲子之宮，初獻六羽。觀春秋之旨，蓋謂僭上既久，賢君能詳問而更始之，故書也。彼祀宋者，各自為一王之後耳。其祖天子禮樂異於周，使行之可也。周尚在而魯倣之，則僭矣。孔子曰：唯名與器不可以假人。夫魯之事，假人孰甚焉。或曰：議者以三代之後，漢唐為盛，如之何可比。隆於古昔也。曰：漢唐其卑矣。高帝起於隴畝，草創天下，法制未修，文景繼立，齷齪守成。公卿多武人，而黃老

刑名之學熾於其間，賈生之徒稱先聖，誦仁義，眊焉而不知所從也。武帝聰明特達，讓袂而作，聘賢良，尊文學，改正朔，易制度，有志於先王矣。然而黷兵好勝，竭天下之財，以事四夷，延方士，築宮館，以求神仙，用不經之言，以東封泰山，禪梁父，光武憂勤民事，而不務大體，專求俗吏之課，不師經籍，而聽用圖讖之書，以疑天下耳目。唐高祖凡庸之材，乘運而起，太宗有非常之度，而殘殺長適，以取其位，不能純用先王之制，而因循駁雜，浮屠亂法，而不知禁進士，壞文，而不知革易置儲貳，依違不決。明皇親見禍亂，心思矯正，而興起老子莊周之說，以害教化，寵任武功，注意兵

食饗與展狩出入不時進用女色間以讒賊以紊經
紀自此數君其餘蓋不足數矣曰封泰山禪梁父前
世之大典也而吾子以為不經之言何如曰所謂經
者二帝三王之事而孔子述之者也六籍是矣而封
禪之文安在哉獨司馬遷封禪書稱自古受命帝王
曷嘗不封禪蓋有無其應而用事者矣未有睹符瑞
見而不臻乎泰山者也於是引尚書舜歲二月東巡
狩至于岱宗柴似以此為封禪事斯禮也蓋繫巡狩
矣天子巡狩至于方岳祭天告至爰及名山大川皆
以其秩望祭之乃事鬼神之常道非封禪之謂也且
舜自正月上日受終於文祖孔氏謂上日朔日也後

至輯五瑞既月乃日觀四岳群牧班瑞于群后孔氏
謂盡以正月中日日見四岳及九州牧監還其瑞歲
二月東巡狩至于岱宗孔氏謂既班瑞之明月乃順
春東巡至於岱宗若是則舜攝帝位纔暮月耳德未
必遽洽於人也功未必遽濟於世也符瑞之見未必
如此之速也况又未真即帝位則將何辭以封禪哉
五載一巡狩巡狩而封禪則舜之在位凡幾年凡幾
封禪其禮儀必有可采何以不廣記之乃獨言柴而
已乎封禪之禮固不止於柴也夫摯見生死之物蓋
其微者猶列之于後矧封禪之盛乃得畧之乎其不
然必矣又稱齊桓公既霸會諸侯於葵丘而欲封禪

管仲曰古者封泰山禪梁父者七十二家而夷吾所
記者十有二焉曰無懷氏曰伏羲曰神農曰炎帝曰
黃帝曰顓頊曰帝嚳曰堯曰舜曰禹曰湯曰周成王
夷吾此言亦無所證孔子修六經祖述堯舜憲章文
武豈前世有封禪之言管氏聞之而孔子不得聞乎
雖誠有之孔子削而不書是亦不足取也子必謂稱
古帝王封禪者皆妄也未知此說根於何時至秦始
皇遂舉而行之逮孝武即位又議封禪事齊人公孫
卿稱其師申公書曰封禪七十二王唯黃帝得上封
又稱申公之言曰漢主亦得上封上封則能僊登天
孝武後乃登封無風雨災於是自喜幸慶幾遇神仙

矣吁可恠哉文中子曰封禪之費非古也以夸天下
其秦漢之侈心乎是誠知言矣或曰子謂漢唐數君
訛雜之如此然其所以闡基緒致昇平者何也曰其
始皆能求輔佐納諫諍夙興夜寐以安天下濟生人
為意此其所以興也及其後世則放逐忠良昵近邪
辟或婦人用事或外戚專政或宦豎竊命官爵授於
匪人貨財散於無用兵革疲於不急荒淫怠慢厭棄
民物皇天震怒奸雄並起而海內土崩矣嗚呼漢唐
之盛猶不足觀漢唐之衰萬世之鑑也

禮論後語

吾為禮論七篇既十五年學者有持章望之論一篇

來以吾為好恠率天下之人為禮不求諸內而競諸
外人之內不充而惟外之飭焉終亦必亂而已矣亦
猶老子之言禮者忠信之薄蓋不知禮之本徒以其
節制文章獻酬揖讓登降俯仰之繁而罪之也嗚呼
章子有耳目邪抑矇且瞶邪有則奚不視吾文聽吾
言吾之論則曰後之人見仁義禮智信列名而齊齒
謂五者之用各有分區故為仁義智信則不取於禮
而任其私以為禮則不能辯仁義知信但以器服物
色升降辭語為玩以為聖人作禮之方止於窮奢極
富炫人聽覽而已矣繇是推本之曰仁義智信者實
用也禮者虛稱也法制之總名也聖人率其仁義智

信之性會而為禮禮成而後仁義智信可見矣賢人
者知乎仁義智信之美而學禮以求之者也禮得而
後仁義智信亦可見矣吾之論如此豈嘗使人為禮
不求諸內而競諸外邪豈嘗以節制文章之類為禮
之實邪章子有耳目不至乎此也夫章子以仁義禮
智信為內猶饑而求食渴而求飲飲食非自外來也
發於吾心而已矣禮樂刑政為外猶冠弁之在首衣
裳之在身必使正之耳衣冠非自內出也嗚呼章子
之惑甚矣夫不諸內者必出於外有諸外者必由於
內孰謂禮樂刑政之大不發於心而偽飭云乎且謂
衣冠非自內出則寒而被之葛熱而被之裘可乎夏

則求輕冬則求暖回出於吾心與饑渴之求飲食一也而章子異之不已惑乎故天下之善無非內者也聖人會其仁義習信而為法制固由於內也賢人學法制以求仁義亦內也謂藍之青朱之赤固其質也布帛之青赤則染矣然染之而受者亦布帛之質也以染鐵石則不入矣是故賢人學法制以求仁義亦內也下愚雖學弗之得矣中庸曰或生而知之或學而知之或困而知之及其知之一也或安而行之或利而行之或勉強而行之及其成功一也然則吾之論何嘗有外邪何憂乎終之必亂邪吾之論則曰聞諸聖人於是引禮運周公六典之類以明之今章子

乃曰學乎聖人者何必易其言是未嘗讀吾之論也趙簡子問子太叔揖讓周旋之禮焉對曰是儀也非禮也夫禮天之經也地之義也民之行也天地之經而民實則之是故為九歌八風七音六律以奉五聲為政事庸力行務以從四時為刑罰威獄使民畏忌以類其震曜殺戮以是言之樂政刑非禮者乎顏淵問仁孔子曰克己復禮為仁請問其目曰非禮勿視非禮勿聽非禮勿言非禮勿動以是言之仁非禮者乎章子尚未讀左氏傳論語宜其病吾言也聖人之於禮其言蓋參差言其大則無事不包言其小則廢事之一耳故周官三百六十職題曰周禮以該之言

其大也其次則曰禮典與治教政刑事配焉其小則曰五禮與射御書數並焉章子得其小而不得其大宜其病吾言也故其說曰走百步外以救人墮溺難也趨百步外以揖人易也趨則為之走則不為之矣已後鄉人一日之生拜之能也坐其下行其後能也聞其急難則不為之死矣是仁義難於禮也又曰順父禮也違父非禮也有人蹈於水火之中已將救之而父在側曰勿救匍匐救之無避也違父可也夫婦異列禮也如妻踣於舅姑之前傷而不興盡力以扶之可也又曰心則愛兄而拜先仲叔此禮之易者固勝仁也千金之寶分則多伯兄是禮不勝仁也吾兄

與嫂鬪則不救有嫂之嫌也此禮之易者固勝義也鄉人之長者鬪於兄救兄不勝則佐之鬪是禮不勝義也嗚呼章子以揖拜為禮宜乎其不得以兼仁義也且章子焉知仁義哉萬物之生無不遂吾所謂仁也萬事之理無不當吾所謂義也而章子方區區以救墮溺死急難為事不亦小乎以一人之力而見墮溺必救見急難必死吾懼章子之仁義所及者寡而天年不獲終也其所謂仁吾曰浮屠而已耳其所謂義吾曰游俠而已耳孔子曰父在觀其志父沒觀其行三年無改於父之道可謂孝矣父沒三年尚不忍改其道父在側曰勿救人於水火而違之可乎已以

救為仁而父曰勿救則父不仁矣已欲仁而彰父之不仁未見可以為仁也父不仁則違之兄之鬪則不辨是非而佐之是父輕而兄重乎兄與嫂鬪則以嫌而不救懼失禮也妻踣而傷則扶之不顧禮焉是妻厚而嫂薄乎厚於妻而薄於嫂茲小入之情輕其父而重其兄雖小人亦不為也章子以是為仁義非吾所敢聞也抑其所謂禮之在內者喪哀祭恭忠君孝父蓋皆仁義之目而不論焉傳美人不知而不愠謂之君子吾不得已而申之者為其惑衆也吾言止是矣章子雖復言吾不愠也

直講李先王文集卷之二

